

**Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидаларын бекіту туралы**

### *Күшін жойған*

Қазақстан Республикасы Ұлттық экономика министрінің 2015 жылғы 20 қаңтардағы № 18 бұйрығы. Қазақстан Республикасы Әділет министрлігінде 2015 жылы 8 мамырда № 11014 тіркелді. Күші жойылды - Қазақстан Республикасы Ұлттық экономика министрінің 2020 жылғы 22 мамырдағы № 42 бұйрығымен

**Ескерту. Күші жойылды – ҚР Ұлттық экономика министрінің 22.05.2020 № 42 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.**

"Табиғи монополиялар және реттелетін нарықтар туралы" 1998 жылғы 9 шілдедегі Қазақстан Республикасы Заңының (бұдан әрі - Заң) 18-4-бабының 3-тармағына сәйкес **БҰЙЫРАМЫН:**

1. Қоса беріліп отырған Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидалары бекітілсін.

2. Қазақстан Республикасы Ұлттық экономика министрлігінің Табиғи монополияларды реттеу және бәсекелестікті қорғау комитеті заңнамада белгіленген тәртіппен:

1) осы бұйрықты Қазақстан Республикасы Әділет министрлігінде мемлекеттік тіркеуді;

2) осы бұйрық мемлекеттік тіркелгеннен кейін он күн күнтізбелік ішінде оны мерзімді баспа басылымдарына және "Әділет" ақпараттық-құқықтық жүйесінде ресми жариялауға жіберуді;

3) оны Қазақстан Республикасы Ұлттық экономика министрлігінің құрылымдық бөлімшелерінің және аумақтық органдарының назарына жеткізуді;

4) осы бұйрықты Қазақстан Республикасы Ұлттық экономика министрлігінің интернет-ресурсында орналастыруды қамтамасыз етсін.

3. Осы бұйрықтың орындалуын бақылау Қазақстан Республикасының Ұлттық экономикасының жетекшілік ететін вице-министріне жүктелсін.

4. Осы бұйрық алғашқы ресми жарияланған күннен кейін күнтізбелік он күн өткен соң қолданысқа енгізіледі.

Министр

Е. Досаев

"КЕЛІСІЛДІ"

Қазақстан Республикасының  
Ауыл шаруашылығы министрі

\_\_\_\_\_ А. Мамытбеков

2015 жылғы 25 ақпан

"КЕЛІСІЛДІ"

Қазақстан Республикасының  
Инвестициялар және даму министрі

\_\_\_\_\_ Ә. Исекешев

2015 жылғы 7 сәуір

"КЕЛІСІЛДІ"

Қазақстан Республикасының  
Энергетика министрі

\_\_\_\_\_ В. Школьник

2015 жылғы 16 ақпан

"КЕЛІСІЛДІ"

Қазақстан Республикасының  
Қаржы министрі

\_\_\_\_\_ Б. Сұлтанов

2015 жылғы 25 наурыз

Қазақстан Республикасы  
Ұлттық экономика министрінің  
2015 жылғы 20 қаңтардағы  
№ 18 бұйрығымен  
бекітілген

**Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидалары**

### **1. Жалпы ережелер**

1. Осы Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды

бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидалары (бұдан әрі – Қағидалар) "Табиғи монополиялар және реттелетін нарықтар туралы" 1998 жылғы 9 шілдедегі Қазақстан Республикасының Заңына (бұдан әрі - Заң) сәйкес әзірленді және реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алуды өткізу тәртібін айқындайды.

2. Осы Қағидаларда көзделген талаптар:

1) Қазақстан Республикасының мемлекеттік сатып алу туралы заңнамасына сәйкес сатып алуды жүзеге асыратын табиғи монополиялар субъектілеріне;

2) акцияларының (қатысу үлестерінің) елу және одан да көп пайызы ұлттық басқарушы холдингке тікелей немесе жанама тиесілі табиғи монополиялар субъектілеріне;

3) Қазақстан Республикасының жаңартылатын энергия көздерін пайдалануды қолдау саласындағы заңнамасына сәйкес білікті энергия өндіруші ұйымнан электр және (немесе) жылу энергиясын сатып алуды жүргізу жағдайларына;

4) Қазақстан Республикасының электр энергетикасы туралы заңнамасына сәйкес орталықтандырылған сауда-саттықтарда, спот нарығында теңгерімдеуші электр энергиясын, сондай-ақ қуаттылығы аз табиғи монополиялар субъектілерінің және өңірлік электр желілік компанияларының сатып алуды жүргізу жағдайларына қолданылмайды.

3. Осы Қағидаларда мынадай ұғымдар пайдаланылады:

1) әлеуетті өнім беруші – сатып алу туралы шарт жасасуға үміткер заңды тұлға, жеке тұлға немесе дара кәсіпкер;

2) әлеуетті өнім берушінің аффилиирленген тұлғасы – аталған әлеуетті өнім берушінің шешімдерін тікелей және (немесе) жанама айқындауға және (немесе) ол қабылдайтын шешімдерге, оның ішінде шарттың немесе өзге де мәміленің күшіне орай ықпал етуге құқығы бар кез келген жеке немесе заңды тұлға, сондай-ақ өзіне қатысты аталған әлеуетті өнім берушінің осындай құқығы болатын кез келген жеке немесе заңды тұлға;

3) біртекті тауарлар, жұмыстар, көрсетілетін қызметтер – бірдей болмаса да, белгілі бір функцияларды орындауға және өзара алмастыруға мүмкіндік беретін ұқсас сипаттамалары бар және ұқсас құрамдас бөліктерден тұратын тауарлар, жұмыстар мен көрсетілетін қызметтер;

4) құзыретті орган – мемлекеттік басқарудың тиісті саласына (аясына) басшылықты жүзеге асыратын мемлекеттік орган;

5) реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін табиғи монополия субъектісі сатып алатын тауарлардың, жұмыстар мен көрсетілетін қызметтердің тізбесі (бұдан әрі – Тізбе) – сатып алудың өлшем бірліктері, көлемдері, мерзімдері, тәсілдері, сондай-ақ бір жылдың ішінде тауарлардың, жұмыстар мен көрсетілетін қызметтердің әрбір түрін сатып алуға жұмсалатын сомалардың ең жоғары мөлшері көрсетілген реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін табиғи монополия субъектісі бір жыл ішінде сатып алатын тауарлардың, жұмыстар мен көрсетілетін қызметтердің номенклатурасы;

6) сатып алу – реттеліп көрсетілетін қызметтерге тарифтерді (бағаларды, алым мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді тапсырыс берушінің осы Қағидаларда белгіленген тәртіппен сатып алуы;

7) стратегиялық тауарлар – табиғи монополиялар субъектілері жылу энергиясын өндіру үшін отын ретінде пайдаланатын көмір, газ, мазут, дизель отыны, электр энергиясын беру және тарату, сумен жабдықтау және (немесе) су бұру салаларындағы табиғи монополиялар субъектілері үшін – электр энергиясы, жылумен жабдықтау саласындағы табиғи монополиялар субъектілері үшін және жылу энергиясын беру және (немесе) тарату саласындағы нормативтік техникалық ысырыптар үшін – жылу энергиясы, газды немесе газ конденсатын магистральдық және (немесе) тарату құбыржолдары арқылы тасымалдау саласындағы табиғи монополиялар субъектілері үшін өз мұқтаждары мен ысыраптары үшін – газ, сумен жабдықтау, жылу энергиясын өндіру салаларындағы табиғи монополиялар субъектілері үшін – сатып алынатын су;

8) стратегиялық тауарларды өндірушілер – стратегиялық тауарларды өндіретін немесе стратегиялық тауарларды өндіруге (өңдеуге) арналған шикізаттың меншік иесі болып табылатын не Қазақстан Республикасының аумағында стратегиялық тауарларды тікелей шетелдік өндірушінің атынан өткізетін жеке және заңды тұлғалар;

9) тапсырыс беруші – осы Қағидаларға сәйкес сатып алуды жүзеге асыратын табиғи монополия субъектісі;

10) тапсырыс берушінің аффилирленген тұлғасы – табиғи монополия субъектісінің шешімдерін тікелей және (немесе) жанама айқындауға және (немесе) ол қабылдайтын шешімдерге, оның ішінде ауызша шартты қоса алғанда, шарттың немесе өзге де мәміленің күшіне орай ықпал ету мүмкіндігі бар тұлға (

берілген өкілеттік шеңберінде оның қызметін реттеуді жүзеге асыратын мемлекеттік органдарды қоспағанда), сондай-ақ табиғи монополия субъектісінің оған қатысты осындай құқығы болатын кез келген тұлға;

11) тендер – әлеуетті өнім берушілердің арасында бәсекелестікті көздейтін және сатып алу шартының барынша пайдалы талаптарын анықтауға бағытталған сатып алу тәсілі;

12) тендерлік комиссия – осы Қағидаларда белгіленген жағдайларда және тәсілдермен тауарларды, жұмыстар мен көрсетілетін қызметтерді сатып алуды жүзеге асыру үшін тапсырыс беруші қызметкерлерінің ішінен қалыптасатын комиссия;

13) тендерлік құжаттама – тендер өткізу шарты мен тәртібін қамтитын тендерлік өтінім дайындау үшін тапсырыс беруші әлеуетті өнімді берушіге ұсынатын құжат;

14) тендерлік өтінім – тендерлік құжаттамаға сәйкес жасалған әлеуетті өнім берушінің тендерлік ұсынысы;

15) тендерлік өтінімді кепілді қамтамасыз ету – тендерге қатысуға ниет білдірген әлеуетті өнім беруші ұсынған ақша кепілзаты немесе банк кепілдігі;

16) уәкілетті орган – табиғи монополиялар салаларында және реттелетін нарықтарда басшылықты жүзеге асыратын мемлекеттік орган.

4. Табиғи монополия субъектісі тендерді мынадай қағидаттарды сақтай отырып өткізеді:

1) тендер рәсімдерін өткізудің ашықтығы және жариялылығы;

2) барлық әлеуетті өнім берушілерді тендерге қатысу үшін тең мүмкіндіктермен қамтамасыз ету;

3) әлеуетті өнім берушілер арасындағы адал бәсекелестік;

4) отандық тауар өндірушілерді және жұмыстардың, көрсетілетін қызметтердің отандық жеткізушілерін қолдау.

5. Стратегиялық тауарларды сатып алуды табиғи монополия субъектісі:

1) электр энергиясы мен қуатының орталықтандырылған сауда нарығына қол жеткізу мүмкін болмаған кезде тиісті тауар нарығында электр энергиясы тапшылығының болуы;

2) электр энергиясының көтерме сауда нарығына қатысу үшін тұтынушыларға қойылатын шарттарға табиғи монополия субъектісінің сәйкес келмеуі;

3) электр энергиясын беру және тарату салаларындағы табиғи монополиялар субъектілерінің шаруашылық қажеттіліктеріне электр энергиясын сатып алуы;

4) газ тапшылығы кезінде оның импортын жүзеге асыратын ұйымдардан газ сатып алу;

5) Қазақстан Республикасының жаңартылатын энергия көздерін пайдалануды қолдау саласындағы заңнамасына сәйкес электр энергиясын сатып алу жағдайларын қоспағанда, стратегиялық тауар өндірушілерден тікелей сатып алуды жүзеге асырады.

6. Табиғи монополиялар субъектілері мазут және (немесе) дизель отыны түріндегі стратегиялық тауарларды мұнайдың меншік иелерінен немесе көрсетілген мұнай өнімдерінің меншік иелері болып табылатын мұнай өнімдерін өндірушілерден сатып алуды жүзеге асырады.

7. Сатып алуға қатысу үшін әлеуетті өнім беруші мынадай біліктілік талаптарына сәйкес келеді:

1) кәсіби біліктілікке, сондай-ақ сатып алатын тауарлардың, жұмыстар мен көрсетілетін қызметтердің нарығында кемінде бір жыл жұмыс тәжірибесіне ие. Сатып алатын тауарлардың, жұмыстар мен көрсетілетін қызметтердің нарығында жұмыс тәжірибесінің болу қажеттілігі туралы талаптар шағын кәсіпкерлік субъектілеріне және мүгедектердің қоғамдық бірлестіктерінің ұйымдарына қолданылмайды;

2) сатып алу туралы шарт бойынша міндеттемелерді орындауға қажетті қаржылық, материалдық және еңбек ресурстардың болуы;

3) сатып алуды жүргізу сәтінде төлемге қабілетті, сондай-ақ оның қаржы-шаруашылық қызметі Қазақстан Республикасының заңнамасына сәйкес тоқтатылмаған және таратылуға жатпауы тиіс.

8. Қазақстан Республикасының заңнамалық актілерінде міндетті түрде аудит жүргізу белгіленген әлеуетті өнім беруші сатып алуға қатысу үшін "Аудиторлық қызмет туралы" 1998 жылғы 20 қарашадағы Қазақстан Республикасы Заңының 5-бабының 2-тармағына сәйкес соңғы қаржылық жылға аудиторлық есептің түпнұсқасын немесе куәландырылған көшірмесін ұсынады.

9. Шарт жасасу үшін мынадай қосымша құжаттар:

1) жобалау алдындағы және (немесе) жобалау-сметалық құжаттама;

2) құрылысқа арналған техникалық құжаттама қажет.

10. Ұзақ мерзімді кезеңге сатып алынатын тауарлар, жұмыстар мен көрсетілетін қызметтер Тізбеде шарттың қолданылу мерзімімен көрсетілуге тиіс.

## **2. Сатып алуды жүзеге асыру тәртібі**

11. Сатып алу процесі:

1) тізбені күнтізбелік жылға қалыптастыруды;

2) өнім берушіні таңдауды, онымен шарт жасасуды;

3) шартты орындауды қамтиды.

12. Табиғи монополия субъектісі бірінші басшының бұйрығымен бекітілген, оның қолы мөрмен расталған келесі күнтізбелік жылға Тізбені жыл сайын 31 желтоқсанға дейінгі мерзімде қалыптастырады және құзыретті мен уәкілетті органдарға мәлімет үшін жібереді. Құзыретті және уәкілетті органға ұсынылатын Тізбе тігілуге және нөмірленуге, соңғы парағы тапсырыс берушінің бірінші басшысының немесе оның міндетін атқарушы тұлғаның қолымен және тапсырыс берушінің мөрімен расталуға тиіс.

Табиғи монополия субъектісі күнтізбелік жыл ішінде Тізбеге өзгерістер мен толықтырулар енгізуге құқылы. Тізбеге өзгерістер мен толықтырулар осы Қағидалардың 3-тармағының 5) тармақшасында белгіленген талаптарға сәйкес келеді және құзыретті мен уәкілетті органдарға олар қабылданған кезден бастап он жұмыс күнінен кешіктірілмей ұсынылады.

13. Осы Қағидалардың 15-тармағында көзделген жағдайларды қоспағанда, реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алуы тендер нысанында және Тізбеге сәйкес жүзеге асырылады.

14. Осы Қағидаларда белгіленген жағдайларда табиғи монополия субъектісі бір көзден алу, жабық тендер, екі кезенді рәсімдер қолданылатын тендер, баға ұсыныстарын сұрату тәсілімен сатып алуды жүзеге асыруға құқылы.

Табиғи монополия субъектісі тауарларды, жұмыстар мен көрсетілетін қызметтерді тендер өткізбестен сатып алуды, егер бір жылда сатып алынатын көлем құндық көріністе осы Қағидалардың 77-тармағында белгіленген шекті мөлшерден аспаған жағдайда жүзеге асырады.

15. Ашық және жабық тендерлер екі кезенді рәсімдер қолданыла отырып өткізіледі.

16. Табиғи монополия субъектісінің көрсетілетін қызметтерін (тауарларын, жұмыстарын) тұтынушы табиғи монополия субъектісі көрсетілетін қызметтерді (тауарларды, жұмыстарды) сатып алуды жүзеге асыратын тендерлерге байқаушы ретінде қатысуға құқылы.

Табиғи монополия субъектісінің көрсетілетін қызметтерін (тауарларын, жұмыстарын) тұтынушы уәкілетті органға тапсырыс берушінің, тендерлік комиссияның, тендерлік комиссия хатшысының (хатшылығының), техникалық сарапшылардың заңсыз іс-әрекеттеріне шағым жасауға құқылы.

17. Табиғи монополия субъектісі өзінің аффилиирленген тұлғалары үшін тендерді бірыңғай ұйымдастырушы ретінде болуға құқылы.

### **3. Тендер өткізу туралы хабарландыру (хабарлама)**

18. Тендер өткізу туралы хабарландыру (хабарлама) мынадай мәліметтерді қамтиды:

1) тапсырыс берушінің толық атауы мен пошта мекенжайы;

2) сатып алудың атауы (сатып алудың атауы Тізбеде көрсетілген сатып алудың атауына сәйкес келуге тиіс), көлемі, тауарлардың, жұмыстар мен көрсетілетін қызметтердің бесеуден кем атауы, сатып алынатын тауарларды, жұмыстар мен көрсетілетін қызметтерді жеткізу орны. Бір тендерде тауарлардың, жұмыстар мен көрсетілетін қызметтердің бес немесе одан көп атауын сатып алған жағдайда, тендер өткізу туралы хабарлама тапсырыс берушінің тендерлік құжаттамасында көрсетілген сатып алынатын тауарлардың, жұмыстар мен көрсетілетін қызметтердің толық тізбесі туралы сілтемені қамтиды. Тапсырыс берушіде тұрақты жұмыс істейтін және Қазақстан Республикасының резиденті болып табылатын тұлғаға тиесілі интернет-ресурсы болған жағдайда, тапсырыс беруші сатып алатын тауарлардың, жұмыстар мен көрсетілетін қызметтердің толық тізбесін интернет-ресурста көрсетеді;

3) сатып алынатын тауарларды, жұмыстар мен көрсетілетін қызметтерді жеткізудің талап етілетін мерзімі;

4) тендерлік құжаттаманы алу тәсілдері мен орны және оның құны, егер осындай көзделсе;

5) тендерлік өтінімдерді ұсыну орны мен соңғы мерзімі;

6) тендерлік өтінімдер салынған конверттерді ашу күні, уақыты мен орны;

7) тапсырыс берушінің сатып алуды жүзеге асыру үшін бөлген сомасы;

8) конкурстық құжаттаманың көшірмелері берілгені үшін әлеуетті өнім берушінің төлемақы енгізуі үшін тапсырыс берушінің деректемелері, егер осындай төлемақы конкурстық құжаттамада көзделген жағдайда.

#### **4. Тендерлік комиссия**

19. Осы қағидаларға 1-қосымшаға сәйкес нысан бойынша ашық тендер өткізу туралы хабарландыруды жариялағанға немесе осы қағидаларға 2-қосымшаларға сәйкес нысан бойынша жасалатын жабық конкурс өткізу кезінде әлеуетті өнім берушілерге хабарламаларды жібергенге дейін тапсырыс беруші тендерлік құжаттаманы, сондай-ақ тендерлік комиссияның құрамын, тендерлік комиссияның хатшысын бекітеді және қажет болған жағдайда тендерлік құжаттамаға сәйкес қажетті техникалық ерекшеліктерді, жоспарларды, сызбаларды, эскиздерді қоса алғанда техникалық және сапалық сипаттамаларға тауарлардың, жұмыстар мен көрсетілетін қызметтердің сәйкестігін анықтау үшін техникалық сарапшыларды айқындайды.



Осы тармақта көрсетілген барлық шешімдерді тапсырыс берушінің бірінші басшысы немесе оның міндетін атқарушы тұлға қабылдайды.

Тендерлік комиссия тапсырыс беруші тендерлік комиссияны құру және сатып алуды өткізу туралы шешімді бекіткен кезден бастап сатып алу туралы шарт күшіне енгенге дейін жұмыс істейді.

Тендерлік комиссия мүшелерінің саны тақ болуы және бес адамнан кем болмауы қажет.

Шағын кәсіпкерлік субъектілері болып табылатын табиғи монополиялар субъектілері үшін тендерлік комиссия мүшелерінің саны тақ санды құрайды және үш адамнан кем болмауға тиіс.

Тендерлік комиссияның құрамына конкурстық комиссияның төрағасы, төрағаның орынбасары және мүшелері кіреді. Төраға болмаған кезде оның функцияларын оны алмастыратын тұлға орындайды.

Тендерлік комиссияның отырысында тендерлік комиссияның қандай да бір мүшесі өндірістік немесе өзге де себептермен болмаған жағдайда, тендерлік комиссия отырысының хаттамасында оның болмау себебі және осы фактіні растайтын құжатқа сілтеме көрсетіледі.

Тапсырыс беруші барлық қаржы жылына тұрақты құрамы бар тендерлік комиссияны құруға құқылы.

20. Тендерлік комиссияның хатшысы мынадай функцияларды жүзеге асырады:

1) бұқаралық ақпарат құралдарында ашық тендер өткізілетіні туралы хабарландыру жариялайды;

2) әлеуетті өнім берушілерге жабық конкурс өткізілетіні туралы хабарламалар жібереді;

3) тендерлік өтінімдер салынған конверттердің сақталуын қамтамасыз етеді;

4) тендерге қатысушыларды тендер қорытындысы туралы жазбаша хабардар етеді.

21. Тендерлік комиссияның отырысы тендерлік комиссияның жалпы санының кем дегенде үштен екі мүшелері қатысқан жағдайда өткізіледі.

Тендерлік комиссияның шешімі ашық дауыс берумен қабылданады және оған тендерлік комиссия мүшелерінің жалпы санының көпшілік дауысы берілсе, қабылданды деп есептеледі. Дауыс тең болған жағдайда, төраға дауыс берген шешім қабылданды деп есептеледі.

Тендерлік комиссия мүшесі ерекше пікір айтуға құқылы, ол жазбаша түрде баяндалады және ашу немесе тендердің қорытындыларын шығару хаттамасына қоса беріледі.

22. Тендерлік комиссияның хатшысы тендерлік комиссияның мүшесі болып табылмайды және тендерлік комиссия шешімдер қабылдаған кезде қатыспайды.

Тендерлік комиссияның хатшысы әлеуетті өнім берушілерге тендерлік құжаттаманы ұсынады, тендерлік құжаттаманы алған әлеуетті өнім берушілерді тіркеу журналын жүргізеді, әлеуетті өнім берушілерден тендерлік өтінімдер салынған конверттерді қабылдайды, тендерлік комиссия отырыстарының күн тәртібі бойынша ұсыныстар, қажетті құжаттар, материалдар дайындайды және тендерлік комиссия отырыстары өткеннен кейін оның хаттамаларын ресімдейді, келіп түскен тендерлік өтінімдер мен конверттерді ашу рәсіміне қатысуға ниет білдірген әлеуетті өнім берушілерді тіркеу журналын жүргізеді, онда тендерлік өтінімдер салынған конверттердің ұсынылған уақыты мен күні, әлеуетті өнім берушінің уәкілетті өкілінің (тендерлік өтінімі салынған конвертті ұсынған және тендерге қатысушы тұлғаның) тегі, аты, әкесінің аты көрсетіледі.

Тендерлік құжаттаманы алған әлеуетті өнім берушілерді тіркеу журналы және тендерлік өтінімдер мен тендерлік өтінімдер салынған конверттерді ашу рәсіміне қатысуға ниет білдірген әлеуетті өнім берушілерді тіркеу журналы тігілуге, нөмірленуге, соңғы парағы бірінші басшының қолымен және тапсырыс берушінің мөрімен расталуға тиіс.

Тапсырыс беруші қажет болған жағдайда хатшының жұмысын орындау үшін хатшылық құрайды, ол тапсырыс берушінің тендерлік комиссия құру туралы бұйрығында хатшылық атынан құжаттарға осы Қағидаларда белгіленген жағдайларда қол қоюға уәкілетті жауапты тұлғаны көрсете отырып көрсетіледі.

Әлеуетті өнім берушілерді тіркеу журналы мынадай мәліметтерді қамтиды:

- 1) тендердің атауы мен оны өткізу мерзімі;
- 2) әлеуетті өнім берушінің уәкілетті өкілінің тегі, аты, әкесінің аты;
- 3) әлеуетті өнім берушінің толық атауы және пошталық мекенжайы;
- 4) конкурсқа қатысуға өтінім салынған конвертті тіркеу күні мен уақыты;
- 5) конкурсқа қатысу өтініміне әлеуетті өнім беруші енгізген өзгерістер және (немесе) толықтырулар туралы ақпарат.

Тапсырыс беруші конкурсқа қатысу өтінімдерін тіркеу журналында тендерге қатысуға өтінімдері тіркеуге қабылданбаған әлеуетті өнім берушілерді осындай қабылдамау себептерін жаза отырып көрсетеді.

23. Техникалық сарапшылар тендерлік комиссия құрамына кірмейді және олардың тендерлік комиссияның шешім қабылдауы кезінде дауыс беру құқығы жоқ.

Техникалық сарапшылар әлеуетті өнім берушілер ұсынған тауарлардың, жұмыстар мен көрсетілетін қызметтердің тендерлік құжаттамадағы талаптарға сәйкестігі жөнінде қорытынды береді. Сараптамалық қорытынды жазбаша ресімделеді және тендерлік комиссия отырысының хаттамасына қоса беріледі.

## **5. Тендерлік құжаттаманың мазмұны**

24. Тапсырыс беруші барлық әлеуетті өнім берушілерге мынадай ақпаратты қамтитын тендерлік құжаттаманы береді:

1) әлеуетті өнім беруші өзінің біліктілік талаптарына сәйкестігін растау үшін ұсынатын құжаттар тізбесі;

2) сатып алынатын тауарлардың, жұмыстар мен көрсетілетін қызметтердің сипаты, техникалық ерекшеліктерді, жоспарларды, сызбаларды, эскиздерді қоса алғанда, олардың қажетті техникалық және сапалық сипаттамалары;

3) сатып алынатын тауарлардың, жұмыстар мен көрсетілетін қызметтердің саны (көлемі);

4) сатып алынатын тауарларды, жұмыстар мен көрсетілетін қызметтерді жеткізу орны мен шарты;

5) сатып алынатын тауарларды, жұмыстар мен көрсетілетін қызметтерді жеткізудің талап етілетін мерзімі;

6) төлем шарты мен сатып алу шартының жобасы;

7) бағадан басқа, критерийлерге сәйкес жеңген тендерлік өтінім анықталатын олардың сипаты, оларға, тендерлік өтінімдерді бағалау және салыстыру әдісінің сипаты;

8) бағада тасымалдау мен сақтандыру, кеден баждарын, салықтарды, алымдарды төлеу шығыстары сияқты және басқа да элементтер қамтылатын нұсқауды қоса алғанда, тендерлік өтінімді есептеу тәсілі мен әдістемесі;

9) тендерлік өтінімнің бағасы көрсетілетін валюта немесе валюталар және тендерлік өтінімдердің бағасын бірыңғай валютаға сәйкес келтіру үшін оларды салыстыру және бағалау мақсатында қолданылатын бағам;

10) Қазақстан Республикасының тіл туралы заңнамасына сәйкес тендерлік өтінімді, сатып алу туралы шартты жасасу және ұсыну тіліне қойылатын талаптар;

11) әлеуетті өнім берушінің тендерлік өтінімнің қолданыс мерзімін көрсету міндеті туралы ақпарат;

12) тендерлік өтінімді қамтамасыз етуді енгізу тәртібі, мөлшері, нысаны, мерзімі;

13) тендерлік өтінімді ұсынудың соңғы мерзімі аяқталғанға дейін әлеуетті өнім берушінің тендерлік өтінімді өзгерту немесе қайтарып алу құқығына және тапсырыс берушінің, тендерлік комиссияның, тендерлік комиссия хатшысының (хатшылықтың) және техникалық сарапшылардың заңсыз іс-әрекетіне әлеуетті өнім берушінің шағымдану құқығына сілтеме;

14) тендерлік өтінімдерді ұсыну орны мен соңғы мерзімі және оларды қолдану мерзімі;

15) әлеуетті өнім берушілер тендерлік құжаттаманың мазмұны бойынша түсіндірмелер сұрататын тәсілдер, сондай-ақ тапсырыс берушінің осы кезеңде өнім берушілермен ашық нысанда және хаттама жасалып өткізілетін кездесулер өткізуге ниеті туралы хабар;

16) тендерлік өтінімдер салынған конверттерді ашу орны, күні және уақыты (тендерлік өтінімдер салынған конверттерді ашу уақыты тендерлік өтінімдерді ұсынудың соңғы мерзімі аяқталған кезден бастап екі сағаттан аспауға тиіс);

17) тендерлік өтінімдер салынған конверттерді ашу және тендерлік өтінімдерді қарау үшін пайдаланылатын рәсімдер;

18) тендер өткізу кезінде тапсырыс берушінің мүддесін білдіруге уәкілетті лауазымды тұлғалар туралы мәліметтер;

19) әлеуетті өнім беруші - отандық тауар өндірушілерге басымдық беру шарттары мен тәртібі.

25. Біртекті тауарларды, жұмыстар мен көрсетілетін қызметтерді сатып алу бойынша тендер өткізу кезінде тапсырыс берушіге тендерлік құжаттамада тауарларды, жұмыстар мен көрсетілетін қызметтерді оларды жеткізу (орындау, көрсету) орны бойынша бөліктерге (лоттарға) бөлу қажет. Бұл ретте тендердің жеңімпазы тауарлардың, жұмыстар мен көрсетілетін қызметтердің әрбір лоты бойынша айқындалады.

26. Әлеуетті өнім беруші тапсырыс берушіден тендерлік құжаттаманың түсініктемесін тендерлік өтінімдерді ұсынудың соңғы мерзімі аяқталғанға дейін күнтізбелік он күн бұрын сұратуға құқылы. Тапсырыс беруші өтінімді алған күннен бастап үш жұмыс күнінен кешіктірмей осы сауалға жауап беруге және мұндай түсініктемені тендерлік құжаттама жолдаған барлық әлеуетті өнім берушілерге жібереді.

27. Тапсырыс беруші тендерлік өтінімдер ұсынудың соңғы мерзімі аяқталғанға дейін жеті жұмыс күні мерзімінен кешіктірмей өзінің бастамасымен немесе әлеуетті өнім берушілердің сауалына жауап ретінде тендерлік құжаттамаға тапсырыс берушінің бірінші басшысының немесе оның міндеттерін атқаратын тұлғаның шешім қабылдау жолымен өзгерістер енгізеді.

Осындай өзгерістер туралы тендерлік құжаттама ұсынылған барлық әлеуетті өнім берушілерге хабарлама беріледі. Бұл ретте тапсырыс беруші тендерлік өтінімдер ұсынудың соңғы мерзімін осы өзгерістерді әлеуетті өнім берушілер тендерлік өтінімдерде ескеруі үшін кемінде күнтізбелік он күн мерзімге ұзартады.

Осы тармақтың талаптары тендерлік комиссия мүшелері жұмыстан шығу немесе олардың лауазымдары өзгеру нәтижесінде болған тендер өткізу кезінде тапсырыс берушінің мүддесін білдіруге уәкілетті лауазымды тұлғалар туралы мәліметтердің өзгеруіне қатысты емес.

28. Тапсырыс беруші тендерлік құжаттамада көрсетілген белгілі бір жерде және уақытта тендерлік құжаттаманың ережелерін түсіндіру үшін әлеуетті өнім берушілермен кездесулер өткізеді.

Бұл ретте тапсырыс беруші кездесу барысында тендерлік құжаттаманы түсіндіру туралы қойылған сұрақтарды, сондай-ақ осы сұрақтарға берілген жауаптарды қамтитын хаттама жасайды. Хаттама тендерлік құжаттама ұсынылған барлық әлеуетті өнім берушілерге жіберіледі.

## **6. Тендерлік өтінімдердің қолданылу мерзімі, мазмұны, ұсынылуы, өзгертілуі және кері қайтарылуы**

29. Тендерге қатысуға ниет білдірген әлеуетті өнім беруші тапсырыс берушіге тендерлік құжаттамаға сәйкес тендерлік өтінімді желімделген конвертте тендерлік өтінімдерді ұсынудың соңғы мерзімі аяқталғанға дейін ұсынуы қажет.

30. Тендерлік өтінімдерді ұсынудың соңғы мерзімі аяқталғаннан кейін алынған тендерлік өтінім ашылмайды және оны ұсынған әлеуетті өнім берушіге қайтарылады.

31. Тендерлік өтінім тендерлік құжаттамаға сәйкес онда көрсетілген мерзім ішінде күшінде болады.

Әлеуетті өнім беруші тендерге қатысу үшін ұсынған тендерлік өтінімді қолдану мерзімі кемінде күнтізбелік отыз бес күн.

Қолдану мерзімі тендерлік құжаттамада көрсетілгеннен қысқа тендерлік өтінім қабылданбайды.

32. Тендерге қатысуға ниет білдірген заңды тұлға болып табылатын әлеуетті өнім берушінің тендерлік өтінімі:

1) осы Қағидаларға 3-қосымшаға сәйкес нысан бойынша тендерге қатысуға арналған өтінімді;

2) әлеуетті өнім берушіге қойылатын біліктілік талаптарына сәйкестігін растайтын құжаттарды:

әлеуетті өнім берушінің сатып алынатын тауарларды, жұмыстар мен көрсетілетін қызметтерді өндіруге, өндеуге, жеткізуге және өткізуге құқығын растайтын лицензиялардың және (немесе) патенттердің, куәліктердің, сертификаттардың, дипломдардың, басқа құжаттардың нотариалды куәландырылған көшірмелерін;

егер сатып алынатын жұмыстар, көрсетілетін қызметтер лицензияланбайтын жағдайда, онда әлеуетті өнім беруші орындайтын көрсетілетін қызметтер түрлерінің тізбесі бар заңды тұлға жарғысынан алынған үзіндінің нотариалды куәландырылған көшірмесін немесе сауда тізілімінен (Қазақстан

Республикасының резиденті еместері үшін) мемлекеттік және (немесе) орыс тілдеріне аудармасы бар нотариалды куәландырылған заңдастырылған үзінді ұсыну қажет;

бірінші басшы немесе оның орнын алмастыратын тұлға, сондай-ақ бас бухгалтер (бухгалтер) қол қойған бухгалтерлік теңгерімнің түпнұсқасын немесе нотариалды куәландырылған көшірмесін;

"Аудиторлық қызмет туралы" 1998 жылғы 20 қарашадағы Қазақстан Республикасы Заңының 5-бабының 2-тармағына сәйкес міндетті түрде аудитті өткізу белгіленген заңды тұлғалардың соңғы қаржылық жыл үшін аудиторлық есебінің түпнұсқасын немесе нотариалды куәландырылған көшірмесін;

құрылтай шартынан немесе құрылтайшылар құрамы туралы жарғыдан алынған нотариалды куәландырылған үзіндіні не конверттерді ашу күнінің алдындағы күнтізбелік отыз күн өткеннен кейін берілген акциялар ұстаушыларының тізілімінен нотариалды куәландырылған көшірмені;

тендерлік өтінімдер салынған конверттерді ашқан күнге дейін үш ай өткеннен кейін берілген салық төлеушіде Қазақстан Республикасы бойынша салық берешегінің, міндетті зейнетақы жарналары, міндетті кәсіптік зейнетақы жарналары мен әлеуметтік аударымдар бойынша берешегінің жоқ (бар) екені туралы белгіленген нысандағы анықтаманы;

қосымша құн салығы бойынша есепке қою туралы куәліктің нотариалды куәландырылған көшірмесін;

Қазақстан Республикасы Ұлттық Банкі Басқармасының 2002 жылғы 30 шілде № 274 қаулысымен бекітілген (Нормативтік құқықтық актілерді мемлекеттік тіркеу тізілімінде № 1972 тіркелген) Екінші деңгейдегі банктер мен ипотекалық компанияларда бухгалтерлік есептің үлгі есепшот жоспарына (бұдан әрі – Үлгі жоспар) сәйкес банкке және банк филиалына анықтама беру күнінің алдында үш айдан астам созылатын әлеуетті өнім беруші міндеттемелерінің барлық түрлері бойынша мерзімі өткен берешегінің жоқтығы туралы әлеуетті өнім берушіге қызмет көрсететін банктің немесе банк филиалының қол қойылған және мөр басылған анықтамасын (егер әлеуетті өнім беруші екінші деңгейдегі бірнеше банктің немесе филиалдардың, сондай-ақ шетелдік банктің клиенті болып табылса, осындай банктердің әрқайсысынан осындай анықтамаларды) қамтиды. Анықтама тендерлік өтінімдер салынған конверттерді ашу күнінің алдындағы бір ай өткеннен кейін берілуі қажет. Егер анықтамада банктің бірінші басшысының қолы қойылмаса, онда анықтама осындай анықтамаларға осы тұлғаның қол қою құқығы берілгенін көздейтін құжаттың көшірмесімен бірге ұсынылады;

егер әлеуетті өнім беруші Қазақстан Республикасының резиденті болмаған және Қазақстан Республикасының салық төлеушісі ретінде тіркелмеген жағдайда , онда осы әлеуетті өнім берушінің Қазақстан Республикасының резиденті емес

екендігі және салықтық есепте тұрмайтындығы туралы Қазақстан Республикасының салық органы анықтамасының түпнұсқасы немесе нотариалды куәландырылған көшірмесі ұсынылады;

егер тендер стратегиялық тауарды сатып алуға жарияланған жағдайда – әлеуетті өнім беруші стратегиялық тауарды өндіруші болып табылатындығын растайтын құжаттардың нотариалды куәландырылған көшірмелерін;

3) ілеспе көрсетілетін қызметтердің құнын қоса алғанда, жеткізілетін тауарлардың, жұмыстар мен көрсетілетін қызметтердің соңғы бағасын құрайтын әлеуетті өнім берушінің барлық нақты шығынын қамтиын осы Қағидаларға 4-қосымшаға сәйкес нысан бойынша берілген әлеуетті өнім беруші ұсынатын бағаны;

4) сәйкестігін растау саласындағы құжаттардың және сатып алу үшін тауарлардың, жұмыстар мен көрсетілетін қызметтердің қолайлылығы мен тендерлік құжаттамаға сәйкестігін растайтын басқа құжаттардың көшірмелерін;

5) техникалық сертификаттарды;

6) ұсынылатын ілеспе көрсетілетін қызметтерді;

7) тендерлік өтінімді қамтамасыз етудің енгізілуін растайтын құжаттың түпнұсқасын қамтиды.

33. Тендерге қатысуға ниет білдірген дара кәсіпкер немесе жеке тұлға болып табылатын әлеуетті өнім беруші ұсынатын тендерлік өтінім:

1) осы Қағидаларға 5-қосымшаға сәйкес нысан бойынша тендерге қатысу өтінімін және жеке куәлігінің немесе паспортының немесе жеке басын куәландыратын құжаттарды ауыстыруға қабылданғаны туралы әділет органдары берген анықтаманың көшірмесін;

2) әлеуетті өнім берушіге қойылатын біліктілік талаптарына сәйкестігін растайтын құжаттарды:

сатып алынатын тауарларды, жұмыстар мен көрсетілетін қызметтерді өндіруге, өңдеуге, жеткізуге және өткізуге әлеуетті өнім берушінің құқығын растайтын лицензиялардың және (немесе) патенттердің, куәліктердің, сертификаттардың, дипломдардың, басқа құжаттардың нотариалды куәландырылған көшірмелерін;

заңды тұлға құрмай-ақ кәсіпкерлік қызметті жүзеге асыруға құқық беретін тиісті мемлекеттік орган берген құжаттың нотариалды куәландырылған көшірмесін;

Үлгі жоспарға сәйкес банкке немесе банк филиалына анықтама беру күнінің алдында үш айдан астамға созылатын әлеуетті өнім беруші міндеттемелерінің барлық түрлері бойынша мерзімі өткен берешегінің жоқтығы туралы әлеуетті өнім берушіге қызмет көрсететін банктің немесе банк филиалының қол қойылған және мөр басылған анықтамасын (егер әлеуетті өнім беруші екінші деңгейдегі

бірнеше банктің немесе филиалдардың, сондай-ақ шетелдік банктің клиенті болып табылса, осындай банктердің әрқайсысынан осындай анықтамаларды) қамтиды. Анықтама тендерлік өтінімдер салынған конверттерді ашу күнінің алдындағы бір айдан кейін берілуі ұажет. Егер анықтамада банктің бірінші басшысының қолы болмаса, онда анықтама осындай анықтамаларға осы тұлғаның қол қою құқығы берілгенін көздейтін құжаттың көшірмесімен бірге ұсынылады;

тендерлік өтінімдер салынған конверттерді ашқан күнге дейін үш ай өткеннен кейін берілген салық төлеушіде Қазақстан Республикасы бойынша салық берешегінің, міндетті зейнетақы жарналары, міндетті кәсіптік зейнетақы жарналары мен әлеуметтік аударымдар бойынша берешегінің жоқ (бар) екені туралы тиісті салық органның анықтамасын;

егер тендер стратегиялық тауарды сатып алуға жарияланған жағдайда – әлеуетті өнім беруші стратегиялық тауарды өндіруші болып табылатындығын растайтын құжаттардың нотариалды куәландырылған көшірмелерін;

3) осы Қағидаларға 4-қосымшаға сәйкес нысан бойынша ұсынылған және жеткізілетін тауарлардың, жұмыстар мен көрсетілетін қызметтердің түпкілікті бағасын құрайтын әлеуетті өнім берушінің барлық нақты шығындарын қамтитын әлеуетті өнім беруші ұсынатын бағаны;

4) сәйкестігін растау саласындағы құжаттардың және сатып алу үшін тауарлардың, жұмыстар мен көрсетілетін қызметтердің қолайлылығы мен тендерлік құжаттамаға сәйкестігін растайтын басқа құжаттардың көшірмелерін;

5) техникалық ерекшеліктерді;

6) ұсынылатын ілеспе көрсетілетін қызметтерді;

7) тендерлік өтінімді қамтамасыз етудің енгізілуін растайтын құжаттың түпнұсқасын қамтиды.

34. Әлеуетті өнім беруші өзінің тендерлік өтінімін тендерлік өтінімді ұсынудың соңғы мерзімі аяқталғанға дейін, сонымен бірге өзінің тендерлік өтінімін кепілді қамтамасыз етілуін қайтарып алу құқығын жоғалтпастан өзгертуге немесе қайтаруға құқылы.

Әлеуетті өнім беруші қайтарып алу туралы хабарламаны жазбаша нысанда, бірақ тендерлік өтінімдер ұсынудың соңғы мерзімінен кешіктірмей жібереді.

Тендерлік өтінімді ұсынудың соңғы мерзімі аяқталғаннан кейін тендерлік өтінімдерге өзгерістер енгізуге жол берілмейді.

35. Әлеуетті өнім беруші тендерлік өтінімді тігілген, беттері нөмірленген түрде ұсынады және соңғы беті өнім берушінің мөрімен және қолымен расталады.



Тендерлік өтінімнің түпнұсқасы және барлық көшірмелері басылған немесе өшірілмейтін сиямен жазылған оған әлеуетті өнім беруші қол қойған түрде ұсынылады.

Тендерлік өтінімнің техникалық бөлігі (тігілген, беттері нөмірленген, соңғы беті заңды тұлғаның немесе дара кәсіпкердің қолымен және мөрімен расталған түрде) және банк кепілдігінің түпнұсқасы тендерлік өтінімге жеке беріледі. Бұл ретте, егер техникалық ерекшелік және (немесе) банктік кепілдік тендерлік өтініммен бірге тігілсе, онда ол осы тендерлік өтінімнен бас тартуға негіз болып табылмайды. Мұндай жағдайда банктік кепілдіктің түпнұсқасы әлеуетті өнім берушіге қайтарылмайды.

36. Әлеуетті өнім беруші тендерлік құжаттамада көрсетілген тендерлік өтінім көшірмелерінің қажетті санын "Түпнұсқа" және "Көшірме" деп жазып ұсынады. Олардың арасында айырмашылық болған жағдайда басымдық түпнұсқада болады.

Тендерлік өтінімде әлеуеттік өнім берушіге ұсынылған өтінімнің мәнін өзгертпей грамматикалық немесе арифметикалық қателерді түзету қажет болатын жағдайларды қоспағанда, жолдар арасына ешбір енгізулерге, өшірулерге және немесе қосымша жазуларға жол берілмейді.

37. Әлеуетті өнім беруші тендерлік өтінімнің түпнұсқасы мен әрбір көшірмесін, оларды "Түпнұсқа" және "Көшірме" деп белгілей отырып, әртүрлі конверттерде желімдейді. Осы конверттерде әлеуетті өнім берушінің атауы мен мекенжайы көрсетіледі. Бұдан кейін конверттер сыртқы конвертке салынып желімделеді.

Ішкі және сыртқы конверттер:

1) тендерлік құжаттамада көрсетілген мекенжай бойынша тапсырыс берушіге жолданады;

2) " \_\_\_\_\_ "(тендердің атауы)" сатып алу жөніндегі тендер, \_\_\_\_\_ (тендерлік құжаттамада көрсетілген конверттерді ашу күні және уақыты) дейін ашылмасын" деген сөздерді қамтиды.

Осы Қағидалардың 34-тармағында көзделген тендерлік өтінімді өзгертуді әлеуетті өнім беруші дайындайды, желімделеді және тендерлік өтінім сияқты ұсынылады.

## **7. Тендерлік өтінімді қамтамасыз ету**

38. Әлеуетті өнім беруші тендерлік өтінімді ұсынған кезде сонымен бір мезгілде оның тендерлік өтінімінде ұсынылған сатып алынатын тауарлар, жұмыстар мен көрсетілетін қызметтер құнының бір пайыз мөлшерінде кепілді

қамтамасыз етуді тендерлік құжаттамада көзделген нысанда, тәсілмен және шарттармен енгізеді.

39. Тендерлік өтінімді қамтамасыз ету мынадай бір түрде ұсынылады:

- 1) банкте орналастырылатын ақша кепілі;
- 2) банк кепілі.

Әлеуетті өнім беруші тендерлік өтінімді ақша кепілі түрінде қамтамасыз етуді тапсырыс берушінің тиісті шотына енгізеді.

40. Тендерлік өтінімді қамтамасыз етуді қолдану мерзімі осы тендерлік өтінімді қолдану мерзімінен кем болмайды.

41. Тапсырыс беруші тендерлік өтінімді қамтамасыз етуді мынадай:

- 1) тендерлік өтінімді қолдану мерзімінің аяқталуы;
- 2) сатып алу шартының күшіне енуі;
- 3) тендерлік өтінімдерді ұсынудың соңғы мерзімі аяқталғанға дейін тендерлік өтінімді қайтарып алу;
- 4) тендерлік өтінімді тендерлік құжаттаманың талаптарына жауап бермейтін өтінім ретінде қабылдамау;
- 5) тендер жеңімпазын айқындамастан сатып алу рәсімін тоқтату жағдайлары туындаған сәттен бастап бес жұмыс күнінің ішінде қайтарады.

42. Тендерлік өтінімді қамтамасыз ету, егер әлеуетті өнім беруші:

- 1) тендерлік өтінімді берудің соңғы мерзімі аяқталғаннан кейін тендерлік өтінімді қайтарып алған немесе өзгерткен;
- 2) егер ол тендер жеңімпазы деп белгіленсе, сатып алу шартын жасамаған жағдайларда тендерлік өтінімді және оның қамтамасыз етілуін ұсынған әлеуетті өнім берушіге қайтарылмайды.

43. Шағын кәсіпкерлік субъектілері және тауарларды, жұмыстар мен көрсетілетін қызметтерді өндіретін Қазақстан Республикасы мүгедектерінің қоғамдық бірлестіктері құрған ұйымдар болып табылатын әлеуетті өнім берушілер олардың тендерлік өтінімдерінде ұсынылған сатып алынатын тауарлардың, жұмыстар мен көрсетілетін қызметтердің құнынан бір пайыз мөлшерде тендерлік өтінімнің кепілді қамтамасыз етуін тендерлік құжаттамада көзделген нысанда, тәсілмен және шарттармен енгізеді.

44. Әлеуетті өнім берушілер, егер:

1) шағын кәсіпкерлік субъектілері болып табылса және тұтастай тендер бойынша олар ұсынатын тауарлардың, жұмыстар мен көрсетілетін қызметтердің көлемі құндық көрінісінде айлық есептік көрсеткіштің алты мың есе мөлшерінен аспаса;

2) тауарларды, жұмыстар мен көрсетілетін қызметтерді өндіретін Қазақстан Республикасы мүгедектерінің қоғамдық бірлестіктері құрған ұйымдар болып табылса, тендер бойынша олар ұсынатын тауарлардың, жұмыстар мен

көрсетілетін қызметтердің көлемі құндық көрінісінде айлық есептік көрсеткіштің он сегіз мың есе мөлшерінен аспаса;

3) тендердің бірінші кезеңіне екі кезеңді рәсімдерді пайдалана отырып қатысса, тендерлік өтінімнің қамтамасыз етуін енгізбейді.

## **8. Тендерлік өтінімдер салынған конверттерді ашу**

45. Тендерлік өтінімдер салынған конверттерді тендерлік комиссия тендерлік құжаттамада көрсетілген күні, уақытта және орында ашады.

Әлеуетті өнім берушілер немесе олардың өкілдері тендерлік өтінімдерді ашу кезінде қатысады және бейне- мен аудио техника құралдарын пайдаланады.

46. Тендерлік өтінімдер салынған конверттерді ашу кезінде тендерлік комиссия қатысушы тұлғаларға тендерге қатысып отырған әлеуетті өнім берушілердің атауы мен мекенжайын, олар ұсынған бағаларды, жеткізу шарты мен төлемін, тендерлік өтінімдерді қайтарып алу мен өзгерту, егер олар құжаттамалық көрсетілсе, тендерлік өтінімді құрайтын құжаттардың болуы немесе болмауы туралы ақпаратты хабарлайды және осы ақпаратты тендерлік өтінімдер салынған конверттерді ашу хаттамасына тіркейді.

Тендерлік өтінімдер салынған конверттерді ашу хаттамасының көшірмесі ашу рәсімі кезінде қатысқан әлеуетті өнім берушілерге алған күні мен уақытын көрсете отырып, қолдарын қойғызып беріледі, жоқ болғандарға - олардан тиісті сұраным алған күннен бастап үш жұмыс күнінен кешіктірілмейтін мерзімде жолданады.

Конкурса қатысуға өтінім салынған конверттерді ашу хаттамасына отырысқа қатысқан барлық конкурстық комиссияның мүшелері, оның төрағасы, оның орынбасары, сондай-ақ конкурстық комиссияның хатшысы қол қояды және әр параққа қол қояды.

## **9. Тендерлік өтінімдерді бағалау және салыстыру**

47. Тендерлік өтінімдерді бағалау және салыстыру кезінде:

1) тендерлік комиссия әлеуетті өнім берушілерден олардың тендерлік өтінімдеріне байланысты түсініктемелер сұратады;

2) тендерлік құжаттаманың талаптарына жауап бермейтін тендерлік өтінімді осы талаптарға сәйкес келтіру үшін сұратуларға, ұсыныстар немесе рұқсаттарға жол берілмейді.

48. Тендерлік комиссия тендерлік өтінімді, егер:

1) әлеуетті өнім беруші біліктілік талаптарына сәйкес келмесе;

2) әлеуетті өнім беруші тендерлік өтінімнің қамтамасыз етуін тендерлік құжаттамада көзделген нысанда, көлемде және шарттармен енгізбесе;

3) осы тендерлік өтінім тендерлік құжаттаманың талаптарына жауап бермесе;  
4) тендерге қатысуға жіберілген әлеуетті өнім берушінің тендерлік өтінімдерінің бағалары осы тауарларды, жұмыстар мен көрсетілетін қызметтерді сатып алуға бөлінген сомадан артық болса қабылдамайды.

49. Тендерлік комиссия бас тартқан тендерлік өтінім тендерлік өтінімдерді бағалау мен салыстыруға қабылданбайды.

50. Тендерлік комиссия, егер:

1) осы Қағидалардың 48-тармағында көзделген негіздердің кез келгені бойынша әлеуетті өнім берушілердің тендерлік өтінімдерінен бас тартқаннан кейін екеуден кем тендерлік өтінім қалған;

2) тендерге қатысуға бірде-бір өтінім түспеген өнім;

3) тендерге қатысуға бір ғана әлеуетті өнім беруші өтінім берген жағдайда тендер немесе лот бойынша сатып алу өтпеді деп таниды. Мұндай жағдайда тендерлік өтінім салынған конверт әлеуетті өнім берушіге ашылмастан қайтарылады.

51. Егер тендер жалпы немесе қандай да бір лот бойынша өткізілмеген деп танылса, онда тапсырыс беруші:

1) тендерлік құжаттаманың мазмұнын өзгертеді және қайта тендер өткізеді;

2) осы Қағидалардың 82-тармағының 4) және 5) тармақшаларында көзделген жағдайларда бір көзден сатып алуды өткізеді.

Осы тармақта көрсетілген іс-қимылдар тапсырыс берушінің бірінші басшысының немесе оның міндетін атқарушы тұлғаның шешімімен ресімделеді.

Қайта ашық тендер өткізу қажет болған жағдайда тапсырыс беруші тендерлік өтінім қабылдау аяқталғанға дейін күнтізбелік он күн мерзімнен кешіктірмей мерзімді баспасөз басылымында хабарлама жариялайды.

52. Тендерлік комиссия бас тартпаған тендерлік өтінімдерді тендерлік комиссия бағалайды және салыстырады және жеңіп алған тендерлік өтінімді ең төменгі бағаның негізінде және мынадай критерийлерді ескере отырып айқындайды:

1) пайдалану, техникалық қызмет көрсету мен жөндеу шығыстары;

2) тауарларды, жұмыстар мен көрсетілетін қызметтерді жеткізу мерзімі;

3) материалдық ресурстардың функционалдық, техникалық және сапалық сипаттамасы;

4) төлем шарттары;

5) тауарларға, жұмыстар мен көрсетілетін қызметтерге арналған кепілді шарттар;

6) отандық тауар өндіруші - әлеуетті өнім берушілерді қолдау;

7) әлеуетті өнім берушінің біліктілік деректері.

53. Тендерлік комиссия тендерлік өтінімнің жеңімпазын анықтаған кезде, отандық тауар өндірушілер болып табылатын әлеуетті өнім берушілердің тендерлік өтінімінің бағасын 20 пайызға шартты түрде төмендетеді.

Отандық тауар өндіруші – әлеуетті өнім берушілер Қазақстан Республикасының резиденттері болып табылатын және:

кеден одағының және (немесе) Қазақстан Республикасының кеден заңнамасына сәйкес Қазақстан Республикасында толығымен өндірілген тауарларды;

кеден одағының және (немесе) Қазақстан Республикасының кеден заңнамасына сәйкес тауарды жеткілікті дәрежеде қайта өңдеу критерийлеріне сәйкес Қазақстан Республикасында жеткілікті дәрежеде қайта өңделген тауарларды өндіретін (бұдан әрі - отандық тауар өндірушілер) жеке және (немесе) заңды тұлғалар.

54. Тендерлік комиссия тендердің қорытындысын тендерлік өтінімдер салынған конверттер ашылған күнінен бастап күнтізбелік жиырма күннен аспайтын мерзімде шығарады.

55. Тапсырыс беруші тендердің қорытындыларын шығарған күннен бастап қатысқан барлық әлеуетті өнім берушілерді тендер өткізілетіні туралы хабарландыру жарияланған мерзімді баспасөз басылымында тендердің атауын көрсете отырып, тендер нәтижелерін, ал тендер өткен жағдайда жеңімпазды, тендер жеңімпазы ұсынған тауардың, жұмыстар мен көрсетілетін қызметтердің атауы мен бірлік бағасын көрсете отырып, жеті жұмыс күні ішінде жариялауды хабардар етеді.

## **10. Тендердің қорытындысы туралы хаттама**

56. Тендер арқылы сатып алуды жүзеге асырған кезде тендерлік комиссия тендердің қорытындылары туралы хаттаманы ресімдейді, онда мынадай ақпарат қамтылады:

1) сатып алынатын тауарлардың, жұмыстар мен көрсетілетін қызметтердің атауы мен қысқаша сипаттары;

2) тендерлік өтінімдерді ұсынған әлеуетті өнім берушілердің атаулары мен мекенжайлары;

3) тендерлік өтінімдерді ұсынған әлеуетті өнім берушілердің біліктілік деректері;

4) әр тендерлік өтінімнің бағасы мен басқа да негізгі шарттары;

5) тендерлік өтінімдердің салыстыруын және бағасын жазу;

6) тендерлік өтінімді қабылдамаған жағдайда - оларды қабылдамау негіздері;

7) әр лот бойынша тендер жеңімпазының атауы мен мекенжайы және жеңімпаз анықталатын шарттар;

8) егер тендер нәтижесінде жеңімпаз анықталмаса – тендерлік комиссияның осындай шешім қабылдауға негіздері;

9) тендерлік құжаттаманы түсіндіру туралы сұрауларды, оларға жауаптарды қорытып жазу, сондай-ақ тендерлік құжаттамаға өзгерістер мен толықтыруларды қорытып жазу;

10) сатып алу туралы шартқа қол қойылатын (бірақ тендер жеңімпазы хабарды алған кезден бастап он жұмыс күнінен аспайтын) мерзім;

11) техникалық сарапшыларды тарту туралы ақпарат;

12) егер конкурс өткен жағдайда, онда Тізбеде көзделген осы тауарларды, жұмыстарды, көрсетілетін қызметтерді сатып алу үшін Тапсырыс берушінің бөлген сомасы.

57. Тендерге қатысушының талабы бойынша оған тендер нәтижелері мен жеңімпазын таңдау себептері туралы жазбаша толық ақпарат ұсынылады.

58. Әлеуетті өнім беруші уәкілетті органға тапсырыс берушінің, тендерлік комиссияның, тендерлік комиссия хатшысының (хатшылығының) және техникалық сарапшылардың заңсыз іс-әрекеттеріне шағымдануға құқылы.

## **11. Сатып алу процесіне байланысты шектеулер**

59. Тапсырыс берушінің екі және одан көп аффилиирленген тұлғасы көрсетілген Тапсырыс беруші өткізетін тендерге (лотқа) қатысуға құқығы жоқ.

60. Тапсырыс берушінің қызметкері, егер ол әлеуетті өнім берушінің лауазымды немесе сенімді тұлғасының жақын туысқаны (ата-анасы, жұбайы, зайыбы, бауырлары, апа-сіңлілері, балалары) немесе өзгеше түрде тендер қорытындысына жеке мүдделі болса, сатып алу рәсімдеріне байланысты міндеттерді орындай алмайды.

61. Әлеуетті өнім берушінің және оның аффилиирленген тұлғасының бір тендерге (лотқа) қатысуға құқығы жоқ.

## **12. Сатып алу шарты**

62. Тапсырыс берушінің қолы қойылған шартпен бірге тендерлік өтінімді жеңімпаз деп тану туралы жазбаша хабарламаны тапсырыс беруші әлеуетті өнім берушіге тендер қорытындысын шығарған күнінен бастап бес жұмыс күні ішінде жібереді.

Сатып алу шарты тараптардың уәкілетті өкілдері қол қойған сәттен бастап күшіне енеді.

63. Тендердің жеңімпазы оның өтінімі жеңімпаз деп танылғаны туралы хабарламаны және сатып алу шартының жобасын алған сәттен бастап он жұмыс күні ішінде шартқа қол қояды немесе орын алған келіспеушіліктер туралы немесе шартқа қол қоюдан бас тартқаны туралы тапсырыс берушіні жазбаша хабардар етеді.

64. Егер әлеуетті өнім беруші тендер жеңімпазы деп танылса және Қағидалардың 63-тармағында белгіленген мерзімде сатып алу шартына қол қоймаса, онда тапсырыс беруші Қағидалардың 52-тармағында белгіленген критерийлерге сәйкес ұсынысы жеңімпаздың ұсынысынан кейін тапсырыс беруші үшін барынша басым болып табылатын тендердің басқа қатысушысымен сатып алу шартын жасасады, ол тендер қорытындылары туралы хаттамамен расталады.

65. Сатып алу шарттары, тендерлік құжаттама, сатып алу хаттамалары, әлеуетті өнім берушілердің өтінімдері және өткізілген сатып алу жөніндегі өзге материалдар тапсырыс берушіде кемінде бес жыл сақталады.

66. Тапсырыс беруші өткізілген сатып алу қорытындылары бойынша жасалған шарттарды тіркеудің бірыңғай журналын жүргізеді.

67. Сатып алу туралы шарттың жобасына немесе қол қойылған сатып алу туралы шартқа өнім берушіні таңдау үшін негіз болған ұсыныстың мазмұнын өзгертетін қандай да бір өзгерістерді және (немесе) жаңа талаптарды (бағаны төмендетуден басқа) енгізуге жол берілмейді.

Сатып алу туралы шарттың жобасына немесе қол қойылған сатып алу туралы шартқа бағаны төмендету бөлігінде өнім берушіні таңдау үшін негіз болған сапа, көлем және басқа да талаптар өзгермеген жағдайда өзгерістер енгізуге жол беріледі.

Егер тауарларды, жұмыстарды, көрсетілетін қызметтерді сатып алу туралы шарттың орындалу процесінде сатып алынатын тауарларға, жұмыстарға, көрсетілетін қызметтерге ұқсастардың бағалары төмендеу жағына өзгерсе, онда тапсырыс беруші мен өнім берушінің өзара келісімі бойынша осы тармақтың ережелерін ескере отырып, сатып алу туралы шартқа тиісті өзгерістер енгізіледі.

68. Сатып алу шартына Қазақстан Республикасы Азаматтық кодексінің нормалары қолданылады.

### **13. Сатып алу тәсілдері және оны ұйымдастыру**

69. Әлеуетті өнім берушілер ашық тендер өткізілетіні туралы хабарландыруды тендерлік өтінімдерді қабылдау аяқталған күнге дейін күнтізбелік жиырма күн бұрын мерзімді баспасөз басылымында жариялаумен хабардар етіледі.

Шағын немесе орта кәсіпкерлік субъектісі болып табылатын табиғи монополия субъектісі тендер өткізілетіні туралы хабарламаны реттеліп көрсетілетін қызметті көрсететін тиісті облыс аумағында таралатын мерзімді баспа басылымында, ал ірі кәсіпкерлік субъектісі болып табылатын табиғи монополия субъектісі аптасына кемінде үш рет шығарылатын және Қазақстан Республикасының барлық аумағында таралатын мерзімді баспа басылымында жариялайды.

Тендерлік өтінімдерді қабылдаудың соңғы мерзімі мен тендерлік өтінімдер салынған конверттерді ашу процесінің басталуы арасындағы уақыт ұзақтығы екі сағаттан аспауға тиіс.

70. Жабық тендер, егер халықаралық шарттарда өзгеше көзделмесе, Қазақстан Республикасының заңнамасына сәйкес Кеден одағының шеңберінде Бірыңғай экономикалық кеңістік аумағындағы тапсырыс берушіге алдын ала белгілі бесеуден аспайтын әлеуетті өнім берушілерде бар тауарларды, жұмыстар мен көрсетілетін қызметтерді сатып алу кезінде жүргізіледі.

71. Жабық тендер өткізілетіні туралы хабарлама қолдарында сатып алынатын тауарлар, жұмыстар мен көрсетілетін қызметтер бар барлық әлеуетті өнім берушілерге осы тендерге қатысуға өтінімдерді қабылдау аяқталған күнге дейін күнтізбелік жиырма күн бұрын жіберіледі.

Хабар жіберілетін әлеуетті өнім берушілердің тізімін тапсырыс берушінің басшысы бекітеді.

72. Екі кезенді рәсімдер қолданылатын тендер:

1) сатып алынатын тауарлардың, жұмыстар мен көрсетілетін қызметтердің егжей-тегжейлі ерекшеліктерін тұжырымдау, сондай-ақ олардың техникалық сипаттамалары мен сапалық көрсеткіштерін анықтау күрделі болған;

2) ғылыми зерттеулер, сынақтар, іздестірулер немесе әзірлемелер жүргізу қажет болған жағдайларда қолданылады.

73. Екі кезенді рәсімді пайдаланатын тендер мынадай кезеңдердің жиынтығын білдіреді:

1) әлеуетті өнім берушілерден тендерлік құжаттаманың негізінде сатып алынатын тауарлардың, жұмыстар мен көрсетілетін қызметтердің техникалық, сапалық және өзге де сипаттамаларына, оларды жеткізудің (орындаудың, көрсетудің) шарттық талаптарына қатысты ұсыныстар сұрату;

әлеуетті өнім берушілер тендерлік құжаттамаға сәйкес ұсынған бағалары көрсетілмеген алғашқы тендерлік өтінімдерді қарау;

әлеуетті өнім берушілердің біліктілік деректерін қарау;

біліктілік талаптарына сәйкес келетін әлеуетті өнім берушілермен тауарлардың, жұмыстар мен көрсетілетін қызметтердің техникалық, сапалық



немесе өзге де сипаттамаларына, шарттық талаптарына, оларды жеткізуге ( орындауға, көрсетуге) қатысты мәселелерді талқылау;

2) тапсырыс берушінің әлеуетті өнім берушілер ұсынған тауарлардың, жұмыстар мен көрсетілетін қызметтердің техникалық, сапалық немесе өзге де сипаттамалардың негізінде тендерлік құжаттамаға өзгерістер енгізуі;

тендердің бірінші кезеңінен өткен әлеуетті өнім берушілердің түпкілікті тендерлік өтінімдерді ұсынуы;

баға ұсыныстары мен бағалау өлшемдерін ескере отырып, оларды бағалау және салыстыру;

тендер қорытындысын шығару.

74. Тендерлік комиссия екі кезеңді рәсімдер пайдаланылатын тендердің қорытындысын соңғы тендерлік өтінімдер салынған конверттерді ашқан күннен бастап күнтізбелік он күннен аспайтын мерзімде шығарады.

75. Баға ұсыныстарын сұратуды пайдалана отырып өнім берушіні таңдау әлеуетті өнім берушілердің қолдарындағы тауарларға, жұмыстар мен көрсетілетін қызметтерге өткізіледі, олардың егжей-тегжейлі ерекшелігінің тапсырыс беруші үшін елеулі мәні болмайды, бұл ретте шешуші шарт баға болып табылады.

76. Баға ұсыныстарын сұрату, егер тауарларды, (жұмыстарды, көрсетілетін қызметтерді) сатып алудың жылдық көлемі: табиғи монополиялар субъектілерінің мемлекеттік тіркелімінің республикалық бөліміне енгізілген табиғи монополиялар субъектілері үшін – төрт мың айлық есептік көрсеткіштен; табиғи монополиялар субъектілерінің мемлекеттік тіркелімінің жергілікті бөліміне енгізілген табиғи монополиялар субъектілері үшін - екі мың айлық есептік көрсеткіштен аспаған жағдайда ғана пайдаланылады.

77. Баға ұсыныстарын сұратуды пайдалана отырып өнім берушіні таңдау тәсілін қолдану мақсатында жыл бойы сатып алынатын біртекті тауарлар түрлерінің жылдық көлемін қаржы жылы ішінде бөлшектеуге жол берілмейді.

78. Тапсырыс беруші сатып алынатын материалдық ресурстарға жазбаша баға ұсыныстарын тапсырыс берушімен және (немесе) өзара аффилиирленбеген кемінде екі әлеуетті өнім берушіден сұратады және келіп түскен барлық баға ұсыныстарын белгіленген мерзімде қарайды. Тапсырыс беруші сатып алу шартын ең төмен баға ұсынысын берген әлеуетті өнім берушімен жасасады.

79. Әрбір әлеуетті өнім беруші бір ғана баға ұсынысын ұсынады, ол жазбаша түрде ресімделеді.

Егер сатып алынатын тауарларды (жұмыстарды, көрсетілетін қызметтерді) сатуға және жеткізуге арналған қызмет міндетті түрде лицензиялануға жататын жағдайда, тапсырыс беруші осындай лицензияның нотариалды куәландырылған көшірмесін сұратады.

80. Тапсырыс беруші әлеуетті өнім берушілерден баға ұсыныстарын сұратуды тіркеу журналын және әлеуетті өнім берушілерден түскен баға ұсыныстарын тіркеу журналын жүргізеді, соңғысында сатып алу тәсілі, әлеуетті өнім берушінің атауы мен пошта мекенжайы, оның жеке сәйкестендіру нөмірі, бизнес сәйкестендіру нөмірі, баға ұсынысын тіркеу күні мен уақыты көрсетіледі.

Көрсетілген журналдар тігілуге, нөмірленуге, соңғы парағы бірінші басшының немесе оны алмастыратын тұлғаның қолымен және тапсырыс берушінің мөрімен расталады.

Баға ұсыныстарын сұрату тәсілімен тауарларды, жұмыстарды, көрсетілетін қызметтерді сатып алу қорытындылары баға ұсыныстарын ұсыну күні аяқталған күнінен бастап екі жұмыс күні ішінде бекітіледі.

81. Бір көзден сатып алу – бұл тендер қолданылмайтын сатып алу тәсілі және мынадай:

1) сатып алынатын тауарлар, жұмыстар және көрсетілетін қызметтер табиғи монополия субъектісі болып табылатын әлеуетті өнім берушіде ғана болатын немесе нарықтың қандай да бір субъектісі тауардың, жұмыстар мен көрсетілетін қызметтердің тиісті түрінің бір ғана әлеуетті өнім берушісі болып табылатын немесе сатып алынатын тауарлар, жұмыстар мен көрсетілетін қызметтер белгілі бір тауар нарығында монополиялық жағдайға ие нарық субъектісінде ғана болатын немесе қандай да бір нақты әлеуетті өнім беруші осы тауарларға, жұмыстар мен көрсетілетін қызметтерге ерекше құқыққа ие болатын;

2) дүлей апаттар (жер сілкінісі, сел, көшкін, су тасқыны және басқалар), табиғи өрт, эпидемия мен эпизоотия, ауыл шаруашылығы өсімдіктері мен ормандардың кеселдері және зиянкестермен зақымдануы, сондай-ақ өнеркәсіп, көлік және басқа да апаттар, өрт (жарылыс), күшті әсер ететін улы, радиоактивті және биологиялық қауіпті заттар тастандыларының (тарату қауіпі бар) апаты, ғимараттар мен құрылыстардың кенеттен қирауы, бөгендердің бұзылуы, тіршілікті қамтамасыз ететін электр энергетикалық және коммуникация жүйелеріндегі, тазарту құрылғыларында апаттық жағдай туғызған төтенше жағдайлардың болу салдарынан Қазақстан Республикасының заңнамасында белгіленген тәртіппен осы тауарларға, жұмыстар мен көрсетілетін қызметтерге шұғыл қажеттілік туындайды, бұл тендер өткізу мүмкіндігін болдырмайтын;

3) қандай да бір өнім берушіден тауарлар, жұмыстар, көрсетілетін қызметтер сатып алған тапсырыс берушіде осы тауарларды, жұмыстарды, көрсетілетін қызметтерді біріздендіру, стандарттау немесе сәйкестігін қамтамасыз ету мақсатында тауарларды, жұмыстар мен көрсетілетін қызметтерді сол бір өнім берушіден сатып алу қажеттігі туындайтын;

4) тендер екі рет өткізілмеді деп танылған және тапсырыс берушінің осы Қағидалардың 51-тармағының 1) тармақшасында көзделген шараларды қабылдауы сатып алу шартын жасасуға алып келмеген;

5) тендер әлеуетті өнім берушілерден өтінімдердің болмауына байланысты өтпеді деп танылған жағдайларда ғана өткізіледі.

82. Тауарларды, жұмыстар мен көрсетілетін қызметтерді бір көзден сатып алудың негіздері мынадай құжаттармен расталады:

1) әлеуетті өнім беруші тиісті біртекті тауарлардың, жұмыстардың, көрсетілетін қызметтердің жалғыз әлеуетті өнім берушісі болып табылатынына байланысты сатып алу қажеттілігін растау үшін - тиісті құзыретті органның осы тауарларды, жұмыстарды, көрсетілетін қызметтерді тапсырыс берушінің сатып алу қажеттілігі туралы сатып алу күніне бір жылдан кешіктірмей берген қорытындысы, осы өнім беруші тиісті тауарлардың, жұмыстардың, көрсетілетін қызметтердің жалғыз әлеуетті өнім берушісі болып табылатынын растайтын құжаттар;

2) қолда бар тауарлармен, жұмыстармен немесе көрсетілетін қызметтермен біріздендіру, стандарттау немесе сәйкестендіруді қамтамасыз ету мақсатында сатып алудың қажеттілігін растау үшін – оған сәйкес әлеуетті өнім берушіден бастапқыда тауарлар, жұмыстар немесе көрсетілетін қызметтер сатып алынған шарт, құзыретті органның сатып алынатын тауардың, жұмыстар мен көрсетілетін қызметтердің сандық және құндық көріністегі көлемі, сондай-ақ қолда бар тауарлармен, жұмыстармен және көрсетілетін қызметтермен стандарттау, біріздендіру және сәйкестендіруді қамтамасыз ету қажеттілігін растайтын техникалық ерекшелік және (немесе) өзге де құжаттама көрсетілген біріздендіру, стандарттау немесе сәйкестендіруді қамтамасыз ету мақсатында осы тауарларды, жұмыстар мен көрсетілетін қызметтерді тапсырыс берушінің сатып алу қажеттілігі туралы қорытындысы;

3) екі ашық тендердің өткізілмегенін растауға байланысты сатып алу қажеттілігін растау үшін – осы тендерлер бойынша құжаттар: тендерлік комиссияларды құру туралы бұйрықтар; тендерлік құжаттамалар; тендерлік өтінімдер салынған конверттерді ашу хаттамалары; тендерлердің қорытындылары туралы хаттамалар; әлеуетті өнім берушілердің қосымшаларымен бірге тендерлік өтінімдері; тендер өткізу туралы мерзімді баспадағы хабарландырулар;

4) ашық тендер өткізген кезде әлеуетті өнім берушілерден тендерлік өтінімдер болмауына байланысты сатып алудың қажеттігін растау үшін – осы тендер бойынша құжаттар: тендерлік комиссия құру туралы бұйрық, тендерлік құжаттама, тендердің қорытындылары туралы хаттама, тендер өткізу туралы мерзімді баспасөздегі хабарландыру.

83. Осы Қағидалардың 82-тармағының 1) және 2) тармақшаларында көзделген жағдайларды қоспағанда, бір көзден сатып алуды жүзеге асыру кезінде әлеуетті өнім беруші біліктілік талаптарына сәйкес келуі қажет.

84. Бір көзден сатып алуды жүзеге асыру кезінде тапсырыс беруші әлеуетті өнім берушіден осы әлеуетті өнім беруші ұсынатын тауарлар, жұмыстар мен көрсетілетін қызметтер бағасының барлық қажетті негіздемелерін сұратады.

85. Тапсырыс беруші бір көзден сатып алуды жүзеге асырған кезде хаттама жасайды, онда мынадай ақпарат қамтылады:

- 1) бір көзден сатып алу тәсілін қолдану негіздемесі;
- 2) сатып алынатын тауарлардың, жұмыстар мен көрсетілетін қызметтердің қысқаша сипаты;
- 3) сатып алу шарты жасалатын әлеуетті өнім берушінің атауы мен мекенжайы және осындай шарттың бағасы.

Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидаларына  
1-қосымша

Нысан

## **Алдағы болатын тендер туралы хабарландыру нысаны**

---

(тапсырыс берушінің толық атауы)  
мынадай тауарларды, жұмыстар мен көрсетілетін қызметтерді:  
(тауарлардың, жұмыстар мен көрсетілетін қызметтердің және олардың санын (көлемін) құнын көрсетпей-ақ қысқаша сипаттау); (бір тендерде тауарлардың, жұмыстар мен көрсетілетін қызметтердің бес және одан көп атауларын сатып алған жағдайда, тендерді өткізу туралы хабарландыру сатып алынатын тауарлардың, жұмыстар мен көрсетілетін қызметтердің толық тізбесі тапсырыс берушінің тендерлік құжаттамасында көрсетілген сілтемені қамтуға тиіс. Тапсырыс берушінің интернет-ресурсы болған кезде, соңғысы сатып алынатын тауарлардың, жұмыстар мен көрсетілетін қызметтердің толық тізбесін интернет-ресурста көрсетеді) сатып алу жөнінде ашық (қайталама) тендер өткізу туралы хабарлайды.  
Тауарлар, жұмыстар мен көрсетілетін қызметтер: \_\_\_\_\_

---

(тауарлар жеткізілетін, жұмыстар орындалатын немесе қызметтер көрсетілетін орын көрсетілсін) жеткізілуге (орындалуға/көрсетілуге) тиіс.

Жеткізудің (орындаудың, көрсетудің) талап етілген мерзімі \_\_\_\_\_

Тендерге қатысуға Қазақстан Республикасы Ұлттық экономика министрінің \_\_\_\_\_ жылғы \_\_\_\_\_ № \_\_\_\_\_ бұйрығымен бекітілген Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстармен көрсетілетін қызметтерді табиғи монополиялар субъектілерінің сатып алу қағидаларының 7-тармағында

көрсетілген біліктілік талаптарына жауап беретін барлық әлеуетті өнім берушілер жіберіледі.

Тендерлік құжаттама пакетін \_\_\_\_\_ жылғы " \_\_\_\_ " \_\_\_\_\_ сағат \_\_\_\_\_ минутқа дейінгі мерзімді қоса алғанда (тендерлік өтінімдер салынған конверттерді ашқанға дейін 24 сағат бұрын уақыты мен күні көрсетілсін) \_\_\_\_\_, мына мекенжай бойынша № \_\_\_\_\_ бөлмеде сағат \_\_\_\_\_-дан \_\_\_\_\_-ге дейін алады.

Тендерлік құжаттама пакетінің құны \_\_\_\_\_ теңгені құрайды және \_\_\_\_\_ Тапсырыс берушінің шотына (тапсырыс берушінің тиісті шоты көрсетілсін) немесе бухгалтерияға енгізіледі. Шағын кәсіпкерлік субъектілері мен тауарларды, жұмыстар мен көрсетілетін қызметтерді өндіретін Қазақстан Республикасы мүгедектерінің қоғамдық бірлестіктері құрған ұйымдарға тендерлік құжаттама тегін беріледі (егер тендерлік құжаттаманы бергені үшін ақы өндіріп алу көзделмеген жағдайда, хабарландыруда тендерлік құжаттаманың тегін берілетіндігін көрсеткен жөн).

Конвертке салынып желімделген тендерге қатысуға тендерлік өтінімдерді әлеуетті өнім берушілер

---

(тапсырыс берушінің толық атауы)

мына мекенжай бойынша \_\_\_\_\_ № \_\_\_\_\_ бөлмеде береді

Тендерлік өтінімдерді ұсынудың соңғы мерзімі \_\_\_\_\_ жылғы " \_\_\_\_ " \_\_\_\_\_ сағат \_\_\_\_\_ минутқа дейін.

Тендерлік өтінімдер салынған конверттерді тендерлік комиссия мына мекенжай бойынша: \_\_\_\_\_ № бөлме \_\_\_\_\_ жылғы " \_\_\_\_ " \_\_\_\_\_ сағат \_\_\_\_ минутта ашады.

Әлеуетті өнім берушілер және олардың өкілдері (бірінші басшының қолымен және мөрмен расталған сенімхатты ұсынып) тендерлік өтінімдер салынған конверттерді ашу кезінде қатысады.

Табиғи монополия субъектісінің көрсетілетін қызметтерін (тауарларын, жұмыстарын) тұтынушылар тауарларды (жұмыстарды, көрсетілетін қызметтерді) сатып алу бойынша \_\_\_\_\_ өткізетін тендерге (тапсырыс берушінің атауы)

байқаушы ретінде қатысуға құқылы.

Қосымша ақпаратты және анықтаманы (телефон нөмірі көрсетілсін) телефон арқылы алады.

Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидаларына  
2-қосымша

Нысан

## **Жабық тендер өткізу туралы хабарлама нысаны**

Кімге \_\_\_\_\_

\_\_\_\_\_ (әлеуетті өнім берушінің атауы)

\_\_\_\_\_ (тапсырыс берушінің атауы)

мынадай көрсетілетін қызметтерді (тауарлардың, жұмыстар мен көрсетілетін қызметтердің қысқаша сипаты және олардың саны (көлемі); (тапсырыс беруші сатып алатын тауарлардың, жұмыстар мен көрсетілетін қызметтердің толық тізбесі, олардың саны мен егжей-тегжейлі ерекшелігі тендерлік құжаттамада көрсетілген деп сілтеме жасауға құқылы) сатып алу бойынша жабық тендерді өткізу туралы Сізді хабарландырады және Сізді оған қатысуға шақырады.

Материалдық, қаржылық ресурстар жеткізіледі (жұмыстар немесе көрсетілетін қызметтер орындалады/көрсетіледі): (материалдық, қаржылық ресурстарды жеткізу, жұмыстар немесе көрсетілетін қызметтерді орындау/көрсету орны көрсетілсін).

Жеткізудің (орындаудың/көрсетудің) талап етілген мерзімі \_\_\_\_\_.

Тендерге Қағидалардың 7-тармағында көрсетілген біліктілік талаптарына сай болатын барлық өнім берушілер жіберіледі.

Тендерлік құжаттама пакетін \_\_\_\_\_ ж. "\_\_\_" \_\_\_\_\_ (тендерлік өтінімдер салынған конвертті ашқанға дейін 24 сағат бұрын күні мен уақыты көрсетілсін) қоса алғанда, дейінгі мерзімде мына мекенжай бойынша \_\_\_\_\_ № \_\_\_\_\_ бөлме сағат \_\_\_-ден \_\_\_-ге дейін немесе мекенжайы \_\_\_\_\_ электрондық пошта арқылы әлеуетті өнім беруші тендерлік құжаттаманың төлемі туралы құжатын ұсынғаннан кейін алады.

Тендерлік құжаттама пакетінің құны \_\_\_\_\_ теңгені құрайды (егер ақы төлеу көзделмесе, осы абзац алып тасталсын).

Әлеуетті өнім берушілер тендерге қатысуға арналған конверттерге салынып желімделген тендерлік өтінімдерін (тапсырыс берушінің атауы көрсетілсін) мекенжай бойынша (толық мекенжай, бөлменің № көрсетілсін) ұсынады (жолдайды).

Тендерлік өтінімдерді ұсынудың соңғы мерзімі \_\_\_\_\_ дейін (уақыты және күні көрсетілсін).

Тендерлік өтінімдер салынған конверттер мынадай мекенжай бойынша (толық мекенжайы, бөлменің № көрсетілсін) ашылады (уақыты және күні көрсетілсін). Әлеуетті өнім берушілер және олардың өкілдері (бірінші басшының қолымен және мөрмен расталған сенімхатты ұсынып) тендерлік өтінімдер салынған конверттерді ашу кезінде қатысады.

Қосымша ақпаратты және анықтаманы (телефон нөмірі көрсетілсін) телефон арқылы алады.

Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидаларына  
3-қосымша

Нысан

## **Тендерге қатысуға арналған өтінім (заңды тұлғалар үшін)**

(Кімге) \_\_\_\_\_

—  
(тапсырыс берушінің атауы)

(Кімнен) \_\_\_\_\_

—

(әлеуетті өнім берушінің атауы)

---

— (тендердің атауы)

тендерді өткізу жөніндегі тендерлік құжаттамаларды қарап, алынуы осымен куәландырылатын, тендерлік құжаттамаға сәйкес

---

— (цифрмен және жазбаша)

жалпы сомаға тауарларды (жұмыстарды орындау, қызметтер көрсету) мынадай лоттар бойынша:

---

---

— (лоттар бойынша тауарлардың, жұмыстар мен көрсетілетін қызметтердің егжей-тегжейлі сипаты)

\_\_\_\_\_ жеткізуді жүзеге асыруды ұсынады.

(әлеуетті өнім берушінің атауы)

Осы тендерлік өтінім мыналардан тұрады:

1. \_\_\_\_\_

— 2. \_\_\_\_\_

— 3. \_\_\_\_\_

— 4. \_\_\_\_\_

— 5. \_\_\_\_\_

— 6. \_\_\_\_\_

— 7. \_\_\_\_\_

— 8. \_\_\_\_\_

— 9. \_\_\_\_\_

---



10. \_\_\_\_\_

— Біздің тендерлік өтінім ұтып шықты деп танылған жағдайда, \_\_\_\_\_ (жазбаша) күн ішінде материалдық, қаржылық ресурстарды (жұмыстар орындауды, қызметтер көрсетуді) жеткізуді бастауға және осы тендерлік өтінімде көрсетілген барлық материалдық, қаржылық ресурстарды (жұмыстарды орындау, қызметтерді көрсету) біздің конкурстық өтінімді ұтып шықты деп тану туралы Сізден хабарлама алған сәттен бастап \_\_\_\_\_ күн ішінде аяқтауға міндеттенеміз.

(жазбаша)

Біз тендерлік құжаттамада ескертілген Сіздің төлем шартыңызбен келісеміз. Төлемнің мынадай балама шарттарын

— (төлем шарттарының баламалары, егер мұндай бар болса, санамаланады) немесе басқа шарттарды ұсынамыз, (санамалау: \_\_\_\_\_) бұл ретте \_\_\_\_\_ (ақшалай мәнде жазбаша көрсетіледі) мөлшерінде баға шегерімін ұсынамыз.

Осы тендерлік өтінім тендерлік өтінімдер салынған конверттерді ашқан күннен бастап \_\_\_\_\_ күн ішінде қолданыста болады.

(жазбаша)

Сатып алу туралы шартты жасасқан сәтке дейін осы тендерлік өтінім оны ұтып шықты деп тану туралы Сіздің хабарламаңызбен бірге біздің арамыздағы міндетті шарт рөлін атқарады.

— (Қолы, күні) (Лауазымы, Т.А.Ә.) М.О.

— (әлеуетті өнім берушінің атауы)

атынан немесе тапсырмасы бойынша барлық өкілеттілігі бар тендерлік өтінімге қол қоюшы.

Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидаларына  
4-қосымша

Нысан

## Әлеуетті өнім берушінің тендерлік өтінімінің бағалар кестесі (әлеуетті өнім берушінің атауы)

(әрбір лотқа жеке толтырылады) \_\_\_\_\_

Тауарлардың, жұмыстар мен көрсетілетін қызметтердің атауы \_\_\_\_\_

1. Қысқаша сипаты
2. Шығарылған елі (жұмыстарды сатып алу кезінде алып тасталсын)
3. Шығарушы зауыт (жұмыстарды және көрсетілетін қызметтерді сатып алу кезінде алып тасталсын)
4. Өлшем бірлігі
5. Баға \_\_\_\_\_ бірлікке \_\_\_\_\_ ИНКОТЕРМС 2010 шарттары бойынша \_\_\_\_\_ (белгіленген пункті)
6. Саны (көлемі)
7. Барлық бағасы = 5 жол x 6 жол \_\_\_\_\_
8. Жалпы бағасы, \_\_\_\_\_ ИНКОТЕРМС 2010 шарттары бойынша \_\_\_\_\_ (белгіленген пункті) әлеуетті өнім берушінің тасымалдау, сақтандыру, кеден бажын, ҚҚС және өзге салықтарды төлеу, төлемдер мен алымдар, жинақтаушы бөлшектер, міндетті қосалқы бөлшектер құны, бір өлшем бірлігіне пайдаланудың бастапқы мерзімі ішінде қызмет көрсетудің барлық шығыстарын қоса алғанда, басқа да шығыстар

Әлеуетті өнім беруші басқа да шығыстарды көрсетуге құқылы, оның ішінде: 8.1., 8.2.

9. Оны ұсыну кезіндегі жеңілдік мөлшері 9.1., 9.2. \_\_\_\_\_

Ескертпе: Әлеуетті өнім беруші 8-жолда көрсетілген жалпы бағаның құрамдастырын көрсетпейді, бұл ретте осы жолда көрсетілген бағаны тендерлік комиссия әлеуетті өнім берушінің барлық шығыстарын ескере отырып, айқындалған ретінде қарайды және қайта қарауға жатпайды.

\_\_\_\_\_ (қолы) (Лауазымы, Т.А.Ә.) М.О.

Реттеліп көрсетілетін қызметтерге тарифтерді (бағаларды, алымдар мөлшерлемелерін) немесе олардың шекті деңгейлерін және тарифтік сметаларды бекіту кезінде шығындары ескерілетін тауарларды, жұмыстар мен көрсетілетін қызметтерді табиғи монополиялар субъектілерінің сатып алу қағидаларына  
5-қосымша

Нысан

(Кімге) \_\_\_\_\_

— (Тапсырыс берушінің атауы)

(Кімнен) \_\_\_\_\_

— (Әлеуетті өнім берушінің аты, әкесінің аты, тегі)

Тендерге қатысуға арналған өтінім (дара кәсіпкерлер және жеке тұлғалар үшін)

\_\_\_\_\_ (тендердің атауы) алынуы осымен куәландырылатын, тендерді өткізу жөніндегі тендерлік құжаттамаларды қарап, тендерлік құжаттамаға сәйкес (цифрмен және жазбаша) жалпы сомаға материалдық, қаржылық ресурстарды (жұмыстар орындау, қызметтер көрсету) мынадай лоттар бойынша

\_\_\_\_\_ (лоттар бойынша тауарларды , жұмыстар мен көрсетілетін қызметтердің егжей-тегжейлі сипаты)

\_\_\_\_\_ (әлеуетті өнім берушінің атауы)

жеткізуді жүзеге асыруды ұсынамын.

Осы тендерлік өтінім мыналардан тұрады:

1. \_\_\_\_\_
2. \_\_\_\_\_
3. \_\_\_\_\_
4. \_\_\_\_\_
5. \_\_\_\_\_
6. \_\_\_\_\_
7. \_\_\_\_\_
8. \_\_\_\_\_
9. \_\_\_\_\_
10. \_\_\_\_\_

Мен, менің тендерлік өтінімім ұтып шықты деп танылған жағдайда, \_\_\_\_\_ (жазбаша) күн ішінде материалдық, қаржылық ресурстарды жеткізуді (жұмыстар орындауды, қызметтер көрсетуді) бастауға және менің тендерлік өтінімім ұтып шықты деп тану туралы Сізден хабарлама алған сәттен бастап осы тендерлік өтінімде көрсетілген барлық материалдық, қаржылық ресурстарды жеткізуді (жұмыстарды орындау, қызметтерді көрсету) \_\_\_\_\_ күн (жазбаша) ішінде аяқтауға міндеттенемін.

Мен тендерлік құжаттамада ескерілген Сіздің төлем шартыңызбен келісемін. Төлемнің мынадай балама шарттарын \_\_\_\_\_

\_\_\_\_\_ (төлем шарттарының баламалары, егер мұндай бар болса, санамаланады) \_\_\_\_\_

\_\_\_\_\_ немесе басқа шарттарды ұсынамын, (ақшалай мәнде жазбаша көрсетіледі) (санамалау: \_\_\_\_\_) және бұл ретте \_\_\_\_\_ мөлшерінде баға шегерімін ұсынамын.

Осы тендерлік өтінім тендерлік өтінімдер салынған конверттерді ашқан күннен бастап \_\_\_\_\_ (жазбаша) күн ішінде қолданыста болады.

Сатып алу туралы шартты жасасқан сәтке дейін осы тендерлік өтінім оны ұтып шықты деп тану туралы Сіздің хабарламаңызбен бірге біздің арамыздағы міндетті шарттың рөлін атқарады.

— \_\_\_\_\_  
қолы) (Т.А.Ә.)